

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA KAKANJ  
Općinsko vijeće**

**Broj:** 01/1-25-Z/18

**Kakanj,** 31.12.2018. godine

**Z A P I S N I K**

**sa 25. redovne sjednice Općinskog vijeća održane 31.12.2018. godine (ponedjeljak) u velikoj sali  
za sastanke Općinskog vijeća sa početkom u 9:00 sati  
(sažetak zapisnika)**

Nakon intoniranja himne Bosne i Hercegovine, 25. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je podsjetio vijećnike da su ostavke na mjesto vijećnika podnijeli Aldin Šljivo i Sedmedin Amidžić, pa je CIK u skladu s tim dodijelio mandat sljedećim kandidatima sa liste SDA Namiru Taliću, odnosno sa liste DF Evelinu Bitiću, te je pozvao nove vijećnike da dadnu svečanu izjavu.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bečirhodžić, Edin Aliefendić, Mejrema Purišević, Izudin Hrusto, Adnan Ibrahimspahić, Amar Selimović, Safet Šahman, Nadina Kovač, Senad Alajbegović i Namir Talić (**SDA**)

Jasmin Mušanović, Semir Mušija, Mirnes Merdić, Mugdin Gorak i Rizah Haračić (**SBB BiH**)

Rešad Merdić, Adisa Škulj, Zerina Kovač i Mirsad Tursum (**S BiH**)

Ahmed Begić, Enes Piljug i Eldin Mijoč (**SDP BiH**)

Slaven Katičić i Ivica Petrović (**HDZ BiH**)

Elvedin Delić (naknadno pristupio) (**A-SDA**)

Nusret Muslić i Evelin Bitić (**samostalni vijećnic**)

Mujo Fafulić (**nacionalna manjina**)

**Odsutni vijećnici:** Muhamed Kubat (**SDA**) i Fahrudin Buza (**SBiH**)

Predsjedavajući je konstatovao da je na sjednici u momentu prijave prisutno 28 vijećnika i vijećnica, te da su se stekli svi potrebni uvjeti za validan rad i odlučivanje Općinskog vijeća.

Pored vijećnika sjednici su prisustvovali:

**Aldin Šljivo**, v.d. općinskog načelnika

**Ferdo Mijač**, sekretar Općinskog vijeća

**Enver Kusić**, sekretar organa uprave

**Mirza Fazlić**, pomoćnik općinskog načelnika za privredu, urbanizam i zaštitu okoline

**Džihad Berbić**, pomoćnik općinskog načelnika za finansije

**Rešad Zaimović**, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

**Nurčo Kurtović**, pomoćnik općinskog načelnika za imovinsko-pravne, geodetske poslove i katastar nekretnina

**Nurudin Hrusto**, pomoćnik općinskog načelnika za civilnu zaštitu

**Zijad Neimarlija**, direktor Zavoda za planiranje i izgradnju općine Kakanj

## Izviestioci, obrađivači, gosti:

Mirnes Bajtarević, direktor JP „Grijanje“ d.o.o. Kakanj  
Haris Veispahić, v.d. direktor JP „Vodokom“ d.o.o. Kakanj

## Predstavnici medija:

NTV IC Kakanj	„Naša riječ“	„Kaportal“
Radio Kakanj	„Kakanjlive“	„Klix portal“
„Kakanjske novine“	„Kakanj-x“	

Kratka saopćenja o radu sjednice i prethodnim pitanjima.

Kolegij Općinskog vijeća je 20.12.2018. godine, održao 25. sjednicu na kojoj je razmatrao:

### **a) Prijedlog okvirnog programa rada Općinskog vijeća za 2019. godinu**

Kolegij je prijedlog okvirnog programam rada uputio Vijeću na razmatranje i usvajanje.

### **b) Inicijativu Naše stranke za uklanjanje rubnika ispred zgrade Suda**

Kolegij je Inicijativu proslijedio na razmatranje i dalje postupanje Zavodu za planiranje i izgradnju općine Kakanj.

### **c) Zahtjev mještana MZ Povezice u vezi rješavanja infrastrukturne problematike**

Zahtjev je prosljeđen na razmatranje i dalje postupanje Odsjeku za mjesne zajednice, Zavodu za planiranje i izgradnju općine Kakanj i Službi za privredu, urbanizam i zaštitu okoline.

### **d) Odgovor Službe za privredu, urbanizam i zaštitu okoline na Zaključak Kolegija**

Odgovor je primljen k znanju.

### **e) Zahtjev Franjevačkog samostana „Sv. Ivana Krstitelja“ za uskraćivanje saglasnosti za davanje koncesije za izgradnju mini hidroelektrana**

Zahtjev Franjevačkog samostana prosljeđen je Službi za privredu, urbanizam i zaštitu okoline na znanje.

### **f) Zahtjev Crvenog križa za izmjenu Odluke o administrativnim taksama**

Zahtjev je prosljeđen Službi za opću upravu, radne i zajedničke poslove, lokalnu samoupravu i mjesne zajednice na razmatranje i dalje postupanje.

### **g) Zahtjev „Best“ d.o.o Travnik za rješavanje ekonomskog ulaza u objekat „Best“**

Zahtjev je prosljeđen Službi za privredu, urbanizam i zaštitu okoline i Zavodu za planiranje i izgradnju općine Kakanj na razmatranje i dalje postupanje

### **h) Zahtjev advokata Ševale Demir za postupanje**

Kolegij je Zahtjev advokata Ševale Demir proslijedio Službi za privredu, urbanizam i zaštitu okoline i Službi za imovinskopravne, geodetske poslove i katastar nekretnina na razmatranje i dalje postupanje.

## Usvajanje zapisnika sa 24. sjednice Općinskog vijeća:

Predsjedavajući je zapisnik sa 24. sjednice Općinskog vijeća stavio na glasanje, te je isti usvojen sa 22 glasa za, bez glasova protiv i 1 glas uzdržan.

## Komentari na dostavljene odgovore na vijećnička pitanja:

**Enes Piljug:** je rekao da je dobio odgovor na jedno od dva postavljena vijećnička pitanja, te je tražio da se pitanje za RMU Kakanj koje se odnosi na postavljanje bukobrana na pretovarnom sistemu ponovo proslijedi istima. Na drugo pitanje u vezi rekonstrukcije puta u Malješu je dobio odgovor da je to industrijski put u vlasništvu Hidrogradnje. S toga je zatražio da se put propisno obilježi kao industrijski i da se inspeksijski naloži vlasniku da izvrši rekonstrukciju istog, odnosno da se zabrani korištenje puta ukoliko se rekonstrukcija ne izvrši u ostavljenom roku.

## Komentari na dostavljena mišljenja na vijećničke inicijative:

**Jasmin Mušanović:** se zahvalio na odgovoru nadležne službe na inicijativu da se u Budžetu Općine za 2019. godinu, predvide sredstva za kupovinu školskog pribora i lanč paketa za djecu koja idu u školu, a spadaju u kategoriju djece (porodica) slabijeg imovinskog stanja. Još je zamolio sve nadležne da ulože maksimalne napore da se izvrši neophodna kategorizacija učenika, kako bi se u budućim izmjenama Budžeta predvidjela sredstva za ugrožene kategorije.

**Enes Piljug:** je rekao da je na inicijativu da se u mjestu Tičići uradi javna rasvjeta dobio odgovor da nije bilo sredstva u Budžetu, te da će predmetni projekat biti u prioritetu u ovoj godini, pa je zatražio da mu se odgovori kako se određuju prioriteti.

**Rizah Haračić:** je rekao da je dobio odgovore na tri vijećničke inicijative podnesene na prethodnim sjednicama Vijeća. Zadovoljan je odgovorom na inicijativu da se formira stručni tim za razmatranje pitanja u vezi dobijanja, odnosno proširenja okolinske dozvole za TC Kakanj. Mišljenjem na drugu inicijativu u vezi rekonstrukcije mosta Crna rijeka nije zadovoljan, jer smatra da je na tom mostu evidentan problem za kretanje pješaka, te je mišljenja da je predmetnu inicijativu trebalo prioritarno uvrstiti u programe za ovu godinu. Što se tiče treće inicijative u vezi problema sa parking prostorom u gradu, rekao je da mu je drago što je dat značaj tom problemu i da se budući načelnik tim problemom mora ozbiljno pozabaviti, te je ponudio i svoj besplatni angažman na iznalaženju rješenja u toj oblasti.

**Izudin Hrusto:** je komentarisao odgovore na dvije podnesene inicijative i to prva za postavljanje saobraćajnih ogledala u Ulici branilaca, pri čemu je naglasio da se nada da će predmetni posao ući u Programe za ovu godinu, a u vezi inicijative za rješavanje problema pasa lualica je rekao da je zadovoljan odgovorom, te traži da se nadležna služba još izjasni kad će se početi na terenu implementirati rješenje ovog problema.

### **Vijećnička pitanja:**

**Enes Piljug:** je postavio dva vijećnička pitanja i to da Služba Općinskog vijeća dostavi podatke o pokrenutim vijećničkim inicijativama od strane kluba vijećnika SDP-a u 2018. godini, odnosno koji je procenat njihove realizacije, te koliko je stavljeno u programe za realizaciju u 2019. godini i drugo pitanje šta je razlog da u JU „KSC“ Kakanj, zaposlenici sa SSS IV – stepen, nemaju isti koeficijent za obračun plate, jer prema njegovim saznanjima zaposlenici sa SSS – koji imaju istu stručnu spremu primaju manju platu do 250,00 KM, dok zaposlenici sa SSS – III stepen imaju veću platu 100,00 KM od nekih zaposlenika sa SSS – IV stepen.

**Rizah Haračić:** je postavio dva vijećnička pitanja. Prvo na koji način se vrši promjena karaktera ulica, odnosno promjena namjene jednosmjerne ulice u dvosmjernu i obrnuto, te ko usvaja i donosi ove odluke, na koji način i na osnovu koje dokumentacije i drugo na koji način se vrši preusmjeravanje saobraćaja tokom vanrednih aktivnosti na užem gradskom području općine Kakanj.

**Safet Šahman:** je postavio dva vijećnička pitanja na koje je tražio usmene odgovore nadležnih. Prvo se odnosi na nezadovoljstvo u realizaciji programa iz 2018. godine, jer niti jedan projekat koji se odnosio na područje Brnjica nije realizovan. Posebno je naglasio projekat puta za Hrastovac za koji je potpisan ugovor, te sanacija klizišta kao posljedica poplava iz 2014. godine i šta taj projekat konkretno podrazumjeva za sanaciju. Drugo pitanje se odnosi na potpisivanje koncesionog ugovora sa RMU Kakanj, odnosno šta će Općina po tom pitanju učiniti, obzirom da je po tom pitanju došlo do određenih zastoja.

**Zijad Neimarlija (odgovor):** je rekao da realizaciju projekata mora pratiti priliv sredstava, što znači da svi projekti nisu mogli biti realizovani zbog nedostatka sredstava, ali da sve što nije realizovano u 2018. godini, biće u prioritetu za realizaciju u 2019. godini.

**Safet Šahman:** je rekao da mu nije jasno kako nije bilo sredstava niti za jedan projekat za Brnjic, te da ima nejasnoće oko sanacije klizišta, jer postoje dva klizišta i nije mu jasno da li je planirana sanacija jednog ili oba.

**Izudin Hrusto:** je postavio dva pitanja na koja je tražio usmeni odgovor. Prvo se odnosi na problem sa doktorom pedijatrom, odnosno nedostatkom istog u Domu zdravlja Kakanj, a drugo se odnosi na realizaciju projekata usvojenih na Vijeću, jer on kao vijećnik ima pitanja od mještana pojedinih sela (Bištrani, Zagrađe, Tičići, Varda i dr.), hoće li i kada biti realizovani pojedini projekti za ta područja općine.

**Mirsad Tursum (odgovor):** je naglasio da je problem sa doktorima pedijatrima prisutan ne samo u Kaknju, već u čitavoj državi. Pedijatara Kakanjaca nema uopće, a jedna doktorica iz Sarajeva je bila upućena na specijalizaciju, ali je dobila bolju ponudu za posao od druge zdravstvene ustanove i tako da

je napustila naš Dom zdravlja. Konkurs za pedijatra u Domu zdravlja Kakanj je neprekidno otvoren i ukoliko se neko javi biće odmah primljen, do tada moli građane za razumjevanje. Osim toga, rekao je da uz jednog pedijatra koji radi kod nas, uvijek budu angažovani dodatni doktori koji nisu početnici, te se tako donekle nadomješta nedostatak pedijataru. U 2019. godini, je planirano slanje jednog doktora na specijalizaciju, ali se mora čekati pet godina, dok se ista završi.

**v.d. općinski načelnik (odgovor):** je rekao da nema sumnje da će ugovoreni radovi u tekućoj godini, biti realizovani u narednoj. Što se tiče problema sa pedijatom rekao je da je već razgovarao sa direktorom Doma zdravlja i da mu je za angažman istog ponudio i mogućnost sufinansiranja od strane Općine, ali da je to jedan opći problem, tako da ga nije lako riješiti. Po pitanju koncesija je naveo da nikakav zvaničan dokument od Kantona po tom pitanju u Općinu nije stigao, ali da je u planu da se već u januaru organizuje sastanak predstavnika Kantona, Rudnika, odnosno Elektroprivrede i Općine, na kojem će se zahtijevati da što prije krene sa potpisivanjem koncesionog ugovora. Još je rekao da su sve općinske tužbe podnesene protiv Kantona i Rudnika, od strane suda ocijenjene kao neustvane, pa se sada ti predmeti nalaze pred Ustavnim sudom, ali ukoliko dođe do potpisivanja sporazuma sa istima, tužbe će biti povučene. Na kraju osnovni cilj je da se u 2019. godini, krene sa plaćanjem koncesija, koji prihodi su planirani u Budžetu Općine za 2019. godinu.

**Edin Aliefendić:** je postavio pitanje kada će biti tehnički prijem objekta ambulanta „Zgošća“, te kada se planira otvaranje istog, jer mještani MZ Zgošća to željno iščekuju.

**Amar Selimović:** je postavio pitanje zašto se u nedostatku parking prostora u gradu dodatno ukidaju postojeća parking mjesta, te da li postoje pismeni zahtjevi, potpisi građana ili bilo šta drugo na osnovu čega je jednosmjerna ulica ispred ugostiteljskog objekta „Pulse“ promjenjena u dvosmjernu. Ukoliko je to bio zahtjev PS Kakanj, da li su isti dostavili bilo šta od navedenog.

Predsjedavajući je konstatovao da je vijećnik Adnan Ibrahimspahić iskoristio pravo na vijećničko pitanje bez korištenja govornice.

#### **Vijećničke inicijative:**

**Eldin Mijoč:** je podnio vijećničku inicijativu da se u Budžetu Općine za 2019. godinu planiraju sredstva za sufinansiranje prevoza učenika autobuskom linijom iz sela Čizmići (MZ Zgošća) do O.Š. Mula Mustafa Bašeskija, obzirom da iz navedenog sela osnovnu školu pohađaju 52 učenika, te je odlazak i dolazak učenika dosta težak, imajući u vidu udaljenost od oko 4 kilometra do škole.

**Safet Šahman:** je podnio dvije vijećničke inicijative. Prva da prilikom izrade Programa utroška sredstava prednost imaju mjesta u ruralnom dijelu općine, odnosno sela. Posebno je istakao da se kroz Programe planiraju: put za Turaliće, Krševac, Hodžiće, Podborje, rasvjeta u Podborju, rasvjeta u Krševcu, Turalićima, Novom Naselju, Hodžićima, te vodovod u Varalićima. Druga je da se produži period sufinansiranja registrovanih obrtnika i poljoprivrednih proizvođača za dodatne dvije godine u procentu od 50% sredstava i to za novoregistrovane i one koji su registrovani ranije. Ovo posebno kad je u pitanju poljoprivredna djelatnost, obzirom da su vremenski uslovi zadnjih godina nepredvidivi, da postoji problem sa plasmanom proizvoda, te činjenica da poljoprivrednici u zimskom periodu nisu u stanju ostvarivati prihode i nisu u ravnopravnom odnosu sa obrtnicima.

**Izudin Hrusto:** je podnio dvije vijećničke inicijative i to da se neposredno uz krug TE Kakanj izgradi natkriveno autobusko stajalište, koje je postojalo ranije, ali je uklonjeno prilikom rekonstrukcije kruga TE Kakanj. Druga je da se u programima za 2019. godinu planiraju sredstva za izgradnju trotoara od naselja Dobjoj do firme „Delta-petrol“, zbog činjenice da cesta prolazi kroz pogon „Separacija“, te je kretanje pješaka veoma otežano, a time bi se olakšalo i saobraćanje vozila.

**Enes Piljug:** je podnio vijećničku inicijativu da se da se jedna ulica u Kaknju zove „Srebrenička“, kako bi na taj način ukazali poštovanje prema svim žrtvama genocida u Srebrenici.

**Mejrema Purišević:** je podnijela dvije vijećničke inicijative. Prva za postavljanje saobraćajnih (sigurnosnih) ogledala u ulici ZPO-a, na raskrsnici prema Plandištu, gdje već postoji ogledalo, ali smatra da pozicija na kojoj se nalazi ne doprinosi boljoj preglednosti raskrsnice i druga inicijativa za postavljanje

metalnih rešetki na slivnicima na regionalnoj cesti R-445 Kakanj-Visoko (na mostu koji se nalazi na potezu od naselja Papratnica do naselja Seoča), jer je frekvencija saobraćaja na ovoj dionici puta uvijek izražena, pri čemu smatra da bi bilo poželjno izvršiti zavarivanje rešetki na slivnicima u cilju trajnijeg rješavanja problema.

**Rizah Haračić:** je podnio dvije vijećničke inicijative i to da se sredstva raspoređena za izgradnju rasvjete u Dumancu preusmjere na projektovanje rasvjete na glavnoj trasi puta, a da se ostatak sredstava preusmjeri na realizaciju po datom projektu, te druga da se pokrene postupak rješavanje problema regionalnog puta R-445, odnosno utvrđivanje trase regionalnog puta kroz područje općine Kakanj.

**Amar Selimović:** je podnio dvije vijećničke inicijative. Prva je da se u Program raspodjele sredstava za 2019. godinu, uvrsti projekat asfaltiranja puta u naseljenom mjestu Donji Lučani i druga da se izvrši adekvatno asfaltiranje dijela puta poslije mosta u naselju Bilješevo prema pružnom prelazu.

**Semir Mušija:** je podnio inicijativu da se usklade pravila i interni akti JU „Centar za socijalni rad Kakanj“ i JU „Mladost“ Kakanj, sa Uredbom sa zakonskom snagom o Javnim ustanovama BiH i to konkretno postupak izbora i imenovanja organa upravljanja u pomenutim ustanovama, jer nisu usklađeni sa Zakonom, a sve u roku od 30 dana.

**Jasmin Mušanović:** je ponovio vijećničku inicijativu podnesenu na nekoj od prethodnih sjednica, a koja nije realizovana. Odnosi se na izgradnju, odnosno omogućavanje pristupa Domu zdravlja u Kaknju invalidnim osobama, jer iste trenutno ne mogu fizički pristupiti objektu, obzirom na izvršenu rekonstrukciju samog Doma zdravlja i okolnog prostora.

Predsjedavajući je konstatovao da su vijećnici Slaven Katičić, Džemal Bećirhodžić i Nusret Muslić podnijeli vijećničke inicijative pismenim putem, bez korištenja govornice.

#### **Utvrđivanje dnevnog reda:**

Predsjedavajući je predložio dnevni red koji je usaglašen na sjednici Kolegija 20.12.2018. godine, te je predložio da se u dnevni red uvrste naknadno pristigli materijali iz Zavoda za planiranje i izgradnju općine Kakanj - Prijedlog odluke o vrijednosti boda komunalne naknade za 2019. godinu i iz Službe za imovinskopravne, geodetske poslove i katastar nekretnina - Prijedlog odluke o utvrđivanju javnog interesa u svrhu proširenja rudarskih radova u „Istočnom reviru“ PK „Vrtlište“ lokalitet Stupe, na području općine Kakanj. Ukoliko Vijeće prihvati predloženo proširenje dnevnog reda predložio je da se iste uvrste kao 6 i 7 tačka, tako da bi Vijeće razmatralo ukupno 13 tačkaka dnevnog reda.

**Eldin Mijoč:** je rekao da je klub SDP-a nije saglasan sa proširivanjem dnevnog reda iz razloga što vijećnici nisu imali vremena da se pripreme za razmatranje tih materijala, obzirom da su ih dobili na samoj sjednici.

**Zijad Neimarlija:** je zamolio Vijeće da uvrste u dnevni red tačku Prijedlog odluke o vrijednosti boda komunalne naknade za 2019. godinu, jer se radi o odluci koja se na kraju svake svake godine usvaja i ona je čisto formalnog karaktera, a zbog previda materijal nije blagovremeno dostavljen vijećnicima.

Predsjedavajući je rekao da je zamoljen od strane direktora RMU Kakanj da se uvrsti u dnevni red tačka Prijedlog odluke o utvrđivanju javnog interesa u svrhu proširenja rudarskih radova u „Istočnom reviru“ PK „Vrtlište“, obzirom da su materijali u stručnu službu dostavljeni ranije, ali zbog određenih tehničkih problema nisu mogli ranije da se dostave vijećnicima. S toga, cijeneći važnost i značaj predmetne odluke za nesmetano odvijanje poslova u Rudniku, predložio je da se ista uvrsti u dnevni red.

Predsjedavajući je predložio da se vijećnici izjasne da li će prihvatiti proširenje dnevnog reda sa predložene dvije tačke.

Vijeće je sa 16 glasova za, 4 protiv i 6 glasova uzdržan, prihvatilo da se u dnevni red uvrste kao 6 i 7 tačka Prijedlog odluke o vrijednosti boda komunalne naknade za 2019. godinu i Prijedlog odluke o utvrđivanju javnog interesa u svrhu proširenja rudarskih radova u „Istočnom reviru“ PK „Vrtlište“ lokalitet Stupe, na području općine Kakanj.

Predsjedavajući je predložio prošireni dnevni red od 13 tačaka.

U raspravi po predloženom dnevnom redu nije niko učestvovao, te je Vijeće sa 17 glasova za, 4 protiv i 6 uzdržanih usvojilo dnevni red za 25. sjednicu.

### **Usvojeni dnevni red:**

1. Prijedlog okvirnog programa rada Općinskog vijeća za 2019. godinu
2. Izmjene i dopune Budžeta Općine Kakanj za 2018. godinu
3. Prijedlog budžeta Općine Kakanj za 2019. godinu
4. Prijedlog odluke o izvršavanju budžeta Općine Kakanj za 2019. godinu
5. Prijedlog odluke o stavljanju van snage Odluke o usvajanju Plana otplate neizmirenih kreditnih obaveza utrošenih za „Rehabilitaciju vodosnabdijevanja grada Kaknja“ sa prijedlogom zaključka o utvrđivanju visine naknade članovima Komisije
6. Prijedlog odluke o vrijednosti boda komunalne naknade u 2019. godini
7. Prijedlog odluke o utvrđivanju javnog interesa u svrhu proširenja rudarskih radova u „Istočnom reviru“ PK „Vrtlište“ lokalitet Stupe na području općine Kakanj
8. Prijedlog odluke o načinu i uslovima raspolaganja nekretninom – prodaje neposrednom pogodbom neizgrađenog građevinskog zemljišta u Kaknju
9. Prijedlog odluke o utvrđivanju javnog interesa u svrhu uređenja desne obale rijeke Zgošće
10. Prijedlog rješenja o utvrđivanju prava vlasništva u korist Šemsudina (Šefkije) Hodžića iz Kaknja
11. Prijedlog odluke o imenovanju člana Općinske izborne komisije
12. Prijedlog rješenja o razrješenju Dalile Subašić, člana Komisije za ljudska prava i ravnopravnost spolova
13. Prijedlog rješenja o imenovanju člana Komisije za ljudska prava i ravnopravnost spolova

### **1. Tačka**

#### **Prijedlog okvirnog programa rada Općinskog vijeća za 2019. godinu**

Predlagač: Kolegij Općinskog vijeća

Obrađivač: Stručna služba za poslove Općinskog vijeća

Izjavitelj: Slaven Katičić, predsjedavajući Općinskog vijeća

U diskusiji je učestvovao Rešad Merdić.

**Rešad Merdić:** je tražio da se u Okvirni program rada Općinskog vijeća za 2019. godinu, uvrsti u mjesecu martu kao tačka 16. Informacija o zaštiti okoliša na području općine Kakanj.

Vijeće je usvojilo Okvirni program rada Općinskog vijeća za 2019. godinu, uz predloženu dopunu da se u Okvirni program rada u mjesecu martu uvrsti razmatranje Informacije o zaštiti okoliša na području općine Kakanj, sa 27 glasova za, bez glasova protiv i uzdržan.

### **2. Tačka**

#### **Izmjene i dopune Budžeta Općine Kakanj za 2018. godinu**

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnika

U diskusiji su učestvovali: Enes Piljug, Eldin Mijoč i Semir Mušija.

**Enes Piljug:** je rekao da je uočio u predloženim izmjenama Budžeta da se u šest stavki iznos smanjuje, dok se u jedanaest povećava, pa mu nije jasno kako i zbog čega se to radi, te zašto se ove izmjene nisu ranije napravile.

**Džihad Berbić:** je pojasnio da Zakon o budžetima dozvoljava restrukturiranje iznosa pojedinih stavki unutar službe i unutar potrošačke jedinice, pa čak i između potrošačkih jedinica i da to može uraditi načelnik svojim zaključkom, ako se radi o iznosima do 10% stavke. Međutim, radi transparentnosti

odlučeno je da se ipak Vijeće o svemu izjasni, kako ne bi bilo nejasnoća prilikom usvajanja izvještaja o izvršenju Budžeta. Što se tiče pitanja zašto izmjene nisu ranije napravljene, rekao je da su troškovi po projektima dinamična kategorija, tako da nije bilo mogućnosti da se predvide svi troškovi i da se izmjene ranije urade.

**Eldin Mijoč:** je rekao da restrukturiranje pojedinih stavki premašuje iznos od 10%, te da se predmetnim izmjenama nastoji pokriti veće trošenje po pojedinih stavkama, te je naglasio da iako se radi o malim iznosima sredstava, trebalo bi to vijećnicima detaljnije pojasniti.

**Semir Mušija:** je rekao da smatra da se moglo i trebalo ranije raspravljati o izmjenama Budžeta, osim o izmjenama koje se tiču odluke CIK-a o finansiranju prijevremenih izbora, te da nije dobra praksa da se sjednica Vijeća zakazuju zadnji dan u godini.

Nakon diskusije Vijeće je sa 18 glasova za, 8 protiv i 2 uzdržana usvojilo Izmjene i dopune Budžeta Općine Kakanj za 2018. godinu.

### **3. Tačka**

#### **Prijedlog Budžeta Općine Kakanj za 2019. godinu**

Predlagač: Općinski načelnik

Obrađivač: Služba za finansije

Izjavitelj: Aldin Šljivo, v.d. općinskog načelnika i Džihad Berbić, pomoćnik općinskog načelnika

U diskusiji su učestvovali Eldin Mijoč, Semir Mušija, Rizah Haračić, Ivica Petrović, Slaven Katičić, Evelin Bitić, Adnan Ibrahimspahić i Edin Aliefendić.

**Eldin Mijoč:** je rekao da Budžet kao planski dokument u formi u kojoj je predložen sadrži dosta dobrih stvari i elemenata koji zaslužuju da se podrže, ali isto tako sadrži i neke stvari za koje je u startu jasno da se ne mogu realizovati. U Budžetu je predviđen prihod od koncesionih naknada od Rudnika, što smatra da se sigurno neće oprihodovati u 2019. godini. Naveo je da je planirano povećanje prihoda po osnovu taksi na istaknutu firmu, a istovremeno se govori o rasterećivanju privrede, pa je preložio da se razmišlja o smanjenju tih prihoda i izmjeni odluke koja reguliše tu materiju. Rekao je da je ogromna razlika između prihoda koji se planiraju ostvariti od rada KSC Kakanj i planiranog izdvajanja iz Budžeta za tu JU. Naglasio je da je uočio u Budžetu značajno povećanje stavke za plaće radnika u Općini, te se onda ne može govoriti o usklađivanju plaća, kako se govorilo na prošloj sjednici Vijeća. Takođe je naglasio, da je evidentan rast troškova po osnovu rada stalnih i povremenih radnih tijela Vijeća i za rad komisija općinskog načelnika. rekao je da se i u 2019. godini planiraju značajna sredstva za podsticaj poljoprivredi, što podržava, ali da bi isto tako trebalo napraviti analizu kakvi su efekti ulaganja u poljoprivredu za sve ove godine. Uočio je značajno izdvajanje iz općinskog Budžeta za rekonstrukciju krova škole u Brnjicu, dok se u nekim ranijim situacijama kada se predlagalo nešto slično, bilo stava da se potrebe škola finansiraju iz kantonalnog Budžeta. Rekao je da je planirano smanjenje troškova sufinansiranja troškova prevoza učenika, smanjenje izdvajanja za općinske stipendije, smanjenje sufinansiranja troškova hitne medicinske pomoći, što bi sve trebalo promijeniti i ove stavke povećati, te je rekao da su troškovi sufinansiranja troškova boravka djece u obdaništu veoma veliki, a da obdanište nije dostupno svima. Zbog toga je predložio da se ubuduće povede malo više računa o navedenim stavkama i da se nastoji da sredstva iz općinskog Budžeta budu u većoj mjeri dostupna svima i pod jednakim uslovima.

**Semir Mušija:** je rekao da SBB neće podržati predloženi Budžet iz razloga što niti jedan prijedlog SBB-a upućen u toku javne rasprave nije prihvaćen na predloženi način, a podsjetio je da se radilo o prijedlogu da se povećaju plaće u svim JU čiji je osnivač Općina, ukoliko dođe do povećanja stavke plaće zaposlenih u Općini, zatim prijedlog da se predvide sredstva za rješavanje gorućih infrastrukturnih problema u osnovnim i srenjim školama u Kaknju, te prijedlog da se planiraju sredstva za medicinski potpomognutu oplodnju. Još je naglasio da u javnoj raspravi nisu učešće uzele mjesne zajednice, pa ga interesuje na koji način su iste obavještene o tome, kao i zašto je došlo do povećanja Budžeta za oko milion KM u odnosu na usvojeni Nacrt Budžeta.

**Rizah Haračić:** je napomenuo da je insistirao prilikom usvajanja prethodna dva Budžeta, što čini i sada, da se nastoje povećati prihodi i to na način da se adekvatno oporezuju svi zagađivači, gdje se u prvom

redu misli na TC Kakanj. Smatra da je broj oboljelih od teških oboljenja u Kaknju uzrokovan zagađenim zrakom, te oni koji zrak zagađuju moraju makar djelimično da obeštete stanovništvo, na način da se od strane Vijeća usvoje akti koji propisuju obaveze zagađivača (TE Kakanj, TC Kakanj i RMU Kakanj) na plaćanje odgovarajućih naknada. Također je naglasio da nije prihvaćen njegov prijedlog za izdvajanje sredstava za pomoć mladim bračnim parovima pri rješavanju problema sa začecem, što smatra da je ogroman problem kako u Kaknju, tako i cijeloj BiH, te kao takav zavređuje pažnju vijećnika. Smatra još da izdvajanja za infrastrukturu samo nekih škola nije uredu, ako se zna da u drugima nema niti osnovnih uslova za školovanje, te predlaže da se u tom pogledu odrede prioritete. Na kraju je ponovo rekao da bi trebalo pokušati iznaći način da se izjednače plaće zaposlenih u JU i JP sa plaćama u Općini, kao i da se iznađe način da se povećaju plaće medicinskom osoblju, kako ne bi imali problema sa odlaskom tog osoblja iz Doma zdravlja. Radi navedenog je predložio pauzu, kako bi se prednji prijedlozi i sugestije usaglasili sa predlagračem Budžeta.

**Ivica Petrović:** je naglasio da plaće zaposlenih u Općini nisu povećane, nego se radi o usklađivanju, a sve kako bi se izbjegle moguće tužbe radnika, na koje bi isti imali pravo ukoliko se predmetno usklađivanje ne bi uradilo. Još je rekao da vijećnici ne određuju visinu plaće u JU i JP, da oni imaju svoje direktore i organe upravljanja, koji su isključivo zaduženi i imaju mandat da o tome odlučuju.

**Slaven Katičić:** je pohvalio što je prijedlog Budžeta pripremljen u zakonskom roku, pa makar i zadnji dan u godini, te je izrazio nadu da će i programi isto tako biti pripremljeni u zdatim rokovima. Rekao je da povećanje iznosa po osnovu taksi na istanutu firmu nije rezultat dodatnog opterećivanja privrede, jer odluka koja to reguliše nije mijenjana, nego je iznos veći zbog povećanja broja obveznika, što je pohvalno i ohrabrujuće. Naglasio je da smatra da je došlo vrijeme da se uradi analiza ulaganja u poljoprivredu, te da se na neki način približe privreda i poljoprivreda, odnosno da se animiraju privrednici na ulaganja u preradu, kako poljoprivredni proizvodi ne bi bili otkupljivani van Kaknja po bagatelnim cijenama, nego da se cjelokupan ciklus odvija u Kaknju, što se isto odnosi i na dostignuti nivo proizvodnje mlijeka i zaštitu i podizanje na viši nivo proizvođača stoke. Smatra da dostignuti nivo saradnje sa predstvanicima MZ-a je veoma dobar i da se značajno osluškujaju potrebe sa terena, pa tako niti jedna MZ prilikom usvajanja programa za 2018. godinu, nije ostala da makar jedan projekat u njoj nije realizovan, te se nada da će tako biti i u programima za narednu godinu. Po pitanju koncesija je rekao da misli da je došlo vrijeme, odnosno da su svi akteri u tom procesu svjesni i saglasni da se u 2019. godini, počne sa naplatom rudničkih koncesija, što je značajan budžetski prihod. Kad se radi o plaćama zaposlenih u JP i JU, nevedo je da se značajnim izdvajanjima iz Budžeta za unapređenje rada JP i JU indirektno vodi računa o plaćama zaposlenih u istim, jer se na taj način olašava i pomaže rad JP i JU i omogućava redovno i uredno isplaćivanje plaća i drugih naknada radnika. Na kraju je rekao da se na osnovu iznesenog može ustvrditi da je predloženi Budžet kvalitetan i sveobuhvatan i da se kao takav može podržati i usvojiti.

**Evelin Bitić:** je tražio pojašnjenje dvije stavke iz prijedloga Budžeta i to zašto je smanjen iznos za stipendiranje studenata za 30 hiljada KM i zbog čega nisu predviđena sredstva za stimulaciju predškolskog odgoja romske i socijalno ugrožene djece, a u prethodnom Budžetu su bila izdvojena sredstva u iznosu od 5 hiljada KM, te je zatražio da se zadrže iznosi kao u Budžetu za 2018. godinu.

**Adnan Ibrahimspahić:** je također tražio da se u Budžetu zadrži prošlogodišnji iznos za stipendiranje studenata i pohvalio je povećanje stavke za nagrađivanje učenika iz oblasti znanja sa 10 na 17 hiljada KM, te je zatražio pojašnjenje u vezi povećanja pojedinih rashoda u JU „Mladost“.

**Edin Aliefendić:** je rekao da je pohvalno što su u Budžetu planirana sredstva za sanaciju krova i uređenje kruga JU „Mladost“, obzirom da je to bio jedan od zahtjeva vijeća roditelja, te je pitao da li se u Budžetu trebala nalaziti stavka izmirenje obaveza po KfW kreditu, a radi se zaostalim neizmirenim obavezama iz 2018. i redovnim obavezama za 2019. godinu ili će se to nekim od programa predvidjeti, a sve imajući u vidu da je jedna od narednih tačaka preuzimanje obaveze izmirenja KfW kredita od strane Općine.

**Džihad Berbić:** je odgovorio na nejasnoće i pitanja vezana za prijedlog Budžeta, pri čemu je rekao da postoji mogućnost da se ne ostvari prihod od koncesija, ali pošto se radi o namjenskim sredstvima u tom slučaju će projekti čije je finansiranje bilo planirano iz tih sredstava biti obustavljeni. Što se tiče taksi na istaknutu firmu, rekao je da je ta stavka planirana prema trenutnoj odluci Vijeća, a prema broju subjekata



obveznika, te ukoliko dođe do promjene odluke i iznos te stavke će biti korigovan. Plaće radnika organa uprave su planirane na osnovu osnovice koju usvaja Vijeće, a usklađivanje vrijednosti boda koje se radilo u toku godine će se morati uraditi već u januaru 2019. godine, te je zbog toga u apsolutnom iznosu predmetne stavke naveden iznos koji će biti potreban za isplatu plaća do kraja godine, te kako bi se mogao finansijski pratiti eventualni rast prosječne plaće u Federaciji BiH. Po pitanju nejasnoća u vezi rekonstrukcije krova škole u Brnjicu važno je znati da se tu radi o kantonalnim sredstvima koja se samo implementiraju putem općinskog Budžeta, dok kad je riječ o smanjenju iznosa za stipendiranje studenata, to je svjesno smanjeno kako bi se inicirali studenti da apliciraju za kantonalnu stipendiju, a svi koji ne ostvare kantonalnu biti će stipendirani općinskom stipendijom, jer će mo mi izmjenama Budžeta povećati taj iznos za onoliko koliko bude trebalo, što je učinjeno i u tekućoj godini. Povećanje određenih stavki na prihodovnoj strani u odnosu na Nacrt Budžeta je iz razloga što je u međuvremenu došlo do povećanja realizacije pojedinih stavki, pa je realno očekivati da one budu na tom nivou i naredne godine, te zbog prenosa pojedinih neutrošenih namjenskih sredstava, što nam je zakonska obaveza obzirom da nisu utrošena u tekućoj budžetskoj godini. Napomenu je da je su osnovne i srednje škole osnovno sredstvo kantona i da se kao takve finansiraju iz kantona, a sve što se iz Budžeta da po bilo kom osnovu za škole je samo stvar naših nastojanja i volje da pomognemo i stvorimo što bolje uslove za rad škola i školovanje učenika. Razlog zašto nisu sve MZ uzele učešće u toku javne rasprave je nama nepoznat, a da je javnost bila upoznata govori i činjenica da su neke MZ uputile svoje prijedloge i amandmane. Kad se radi o prihodima iz fonda okoliša rekao je da se oni sastoje iz dva izvora i to sredstva koja se izdvajaju prilikom registracije vozila i prihoda od TE Kakanj, tako da zaista trećeg izvora prihoda nema. JU „Mladost“ je uputila amandman za tri stvari i to povećanje plaće radnika, troškova prevoza i pomoći za slučaj smrti. Sa menadžmentom istih smo dogovorili da će iznos za plaće ostati nepromijenjen, ali zbog odliva radnika (dva radnika manje) oni će imati mogućnost ta sredstva iskoristiti za povećanje plaća ostalih radnika, dok što se tiče naknade troškova prevoza taj iznos smo povećali, obzirom da nam je cilj da svi budžetski korisnici imaju identičnu visinu te naknadu, a udovoljeno im je i po prijedlogu za pomoć u slučaju smrti, ali prethodno moraju uskladiti svoje interne akte. Što se tiče amandmana u vezi izmirenja obaveza po KfW kreditu isti se prihvata i uvrštava u Budžet. Taj iznos sadržava izmirenje zaostalih neizmirenih obaveza od strane JP „Vodokom“ za 2018. godinu, te izmirenje obaveza za 2019. godinu, prema otplatnom planu. S tim da Služba za privredu treba u organizacionom dijelu, transfer Zavodu za planiranje - utrošak sredstva od rada termoelektrana od 1.568.000 KM, umanjiti za iznos neplaćenih obaveza po KfW kreditu za 2018. godinu i tekuće izmirenje obaveza za 2019. godinu.

Nakon diskusije Vijeće je usvojilo Budžet Općine Kakanj za 2019. godinu sa 17 glasova za, 3 protiv i 7 uzdržanih.

#### **4. Tačka**

##### **Prijedlog odluke o izvršavanju Budžeta Općine Kakanj za 2019. godinu**

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnika

U diskusiji nije niko učestvovao i Vijeće je usvojilo Odluku o izvršavanju Budžeta Općine Kakanj za 2019. godinu sa 17 glasova za, 3 protiv i 7 uzdržanih.

#### **5. Tačka**

##### **Prijedlog odluke o stavljanju van snage Odluke o usvajanju Plana otplate neizmirenih kreditnih obaveza utrošenih za „Rehabilitaciju vodosnabdijevanja grada Kaknja“ sa prijedlogom zaključka o utvrđivanju visine naknade članovima Komisije**

Predlagač: Komisija za utvrđivanje prijedloga akata i načina otplate KfW kredita

Obrađivač: Komisija za utvrđivanje prijedloga akata i načina otplate KfW kredita

Izjavitelj: Edin Aliefendić, predsjednik Komisije

U diskusiji nije niko učestvovao i Vijeće je usvojilo Odluku o stavljanju van snage Odluke o usvajanju Plana otplate neizmirenih kreditnih obaveza utrošenih za „Rehabilitaciju vodosnabdijevanja grada Kaknja“ i Zaključak o visini naknade članovima Komisije sa 20 glasova za, 2 protiv i 5 uzdržanih.

## **6. Tačka**

### **Prijedlog odluke o vrijednosti boda komunalne naknade u 2019. godini**

Predlagač: Općinski načelnik  
Obrađivač: Zavod za planiranje i izgradnju općine Kakanj  
Izjavitelj: Zijad Neimarlija, direktor Zavoda

U diskusiji nije niko učestvovao i Vijeće je usvojilo Odluku o vrijednosti boda komunalne naknade u 2019. godini sa 19 glasova za, niko protiv i 6 uzdržanih.

## **7. Tačka**

### **Prijedlog odluke o utvrđivanju javnog interesa u svrhu proširenja rudarskih radova u „Istočnom reviru“ PK „Vrtlište“ lokalitet Stupe na području općine Kakanj**

Predlagač: Općinski načelnik  
Obrađivač: Služba za imovinskopravne, geodetske poslove i katastar nekretnina  
Izjavitelj: Nurčo Kurtović, pomoćnik općinskog načelnika

U diskusiji je učestvovao Enes Piljug.

**Enes Piljug:** je zatražio da neko vijećnicama pojasni detalje u vezi predmetne odluke, obzirom da su materijali kasno stigli i vijećnici se nisu imali vremena pripremiti za diskusiju po istoj.

**Nurčo Kurtović:** je rekao da je Služba za imovinskopravne, geodetske poslove i katastar nekretnina obrađivač predmetnog materijala po zahtjevu RMU Kakanj, te da je sve urađeno u skladu sa zakonom i prema ustaljenoj proceduri kad se radi o utvrđivanju javnog interesa.

Vijeće je sa 20 glasova za, bez glasova protiv i 5 uzdržanih, usvojilo Odluku o utvrđivanju javnog interesa u svrhu proširenja rudarskih radova u „Istočnom reviru“ PK „Vrtlište“ lokalitet Stupe na području općine Kakanj.

## **8. Tačka**

### **Prijedlog odluke o načinu i uslovima raspolaganja nekretninom – prodaje neposrednom pogodbom neizgrađenog građevinskog zemljišta u Kakanju**

Predlagač: Općinski načelnik  
Obrađivač: Služba za imovinskopravne, geodetske poslove i katastar nekretnina  
Izjavitelj: Nurčo Kurtović, pomoćnik općinskog načelnika

U diskusiji nije niko učestvovao i Vijeće je sa 24 glasova za, bez glasova protiv i uzdržanih, usvojilo Odluku o načinu i uslovima raspolaganja nekretninom – prodaji neposrednom pogodbom neizgrađenog građevinskog zemljišta u Kakanju.

## **9. Tačka**

### **Prijedlog odluke o utvrđivanju javnog interesa u svrhu uređenja desne obale rijeke Zgošće**

Predlagač: Općinski načelnik  
Obrađivač: Služba za imovinskopravne, geodetske poslove i katastar nekretnina  
Izjavitelj: Nurčo Kurtović, pomoćnik općinskog načelnika

U diskusiji nije niko učestvovao i Vijeće je sa 25 glasova za, bez glasova protiv i uzdržanih, usvojilo Odluku o utvrđivanju javnog interesa u svrhu uređenja desne obale rijeke Zgošće.

### **10. Tačka**

#### **Prijedlog rješenja o utvrđivanju prava vlasništva u korist Šemsudina (Šefkije) Hodžića iz Kaknja**

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

U diskusiji nije niko učestvovao i Vijeće je usvojilo Rješenje o utvrđivanju prava vlasništva u korist Šemsudina (Šefkije) Hodžića iz Kaknja sa 25 glasova za, bez glasova protiv i uzdržanih.

### **11. Tačka**

#### **Prijedlog odluke o imenovanju člana Općinske izborne komisije**

Predlagač: Komisija za izbor i imenovanja

Izjavitelj: Edin Aliefendić, predsjednik Komisije

U diskusiji nije niko učestvovao i Vijeće je za člana Općinske izborne komisije imenovalo Maju Benić sa 17 glasova za, 5 protiv i 3 uzdržana.

### **12. Tačka**

#### **Prijedlog rješenja o razrješenju Dalile Subašić, člana Komisije za ljudska prava i ravnopravnost spolova**

Predlagač: Komisija za izbor i imenovanja

Izjavitelj: Edin Aliefendić, predsjednik Komisije

U diskusiji nije niko učestvovao i Vijeće je sa 25 glasova za, bez glasova protiv i uzdržan usvojilo Rješenje o razrješenju Dalile Subašić, člana Komisije za ljudska prava i ravnopravnost spolova.

### **13. Tačka**

#### **Prijedlog rješenja o imenovanju člana Komisije za ljudska prava i ravnopravnost spolova**

Predlagač: Komisija za izbor i imenovanja

Izjavitelj: Edin Aliefendić, predsjednik Komisije

U diskusiji nije niko učestvovao i Vijeće je sa 24 glasa za, bez glasova protiv i uzdržan usvojilo Rješenje o imenovanju Nadine Kovač za člana Komisije za ljudska prava i ravnopravnost spolova.

Predsjedavajući je zaključio rad 25. sjednice Općinskog vijeća u 12:15 sati.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR  
OPĆINSKOG VIJEĆA**  
Ferdo Mijač

**PREDSJEDAVAJUĆI  
OPĆINSKOG VIJEĆA**  
Slaven Katičić